

Poribljavanje ribolovnih voda Bosne i Hercegovine u 1969. godini

Savez sportskih ribolovaca Bosne i Hercegovine nastoji da što potpunije izvršava svoje statutarne obaveze i da svojim **udruženjima i drugim** organizacijama učlanjenim u savez pruži što veću pomoć u razvijanju sportskog ribolova, ribolovnog turizma i u zaštiti i unapređenju ribljeg fonda. Zato već niz godina organizovano sprovodi različite mjere za unapređenje ribarstva s tim da posebnu pažnju poklanja akcijama poribljavanja ribolovnih voda. Već sedam godina Savez je pokretač i organizator izvršenja zajedničkih republičkih planova poribljavanja ribolovnih voda i ove akcije iz godine u godinu daju sve bolje rezultate.

Poribljavanje ribolovnih voda je jedan od osnovnih zadataka organizacija sportskih ribolovaca, koje se danas u smislu određaba Zakona o slatkovodnom ribarstvu SRBiH, javljaju kao korisnici ribljeg fonda. Korisnici ribljeg fonda po tom pitanju imaju tačno određene zakonske obaveze i pri izvršavanju istih ne javljaju se samo materijalne poteškoće nego i mnoge druge jer se rad u najvećem broju udruženja obavlja na amaterskoj osnovi. Zato je mnogim udruženjima, a naročito malim koja nemaju nikakvih tradicija niti iskustava u poslovima poribljavanja, pomoć saveza i te kako dobro došla. Organizovanim i metodskim radom Savez je uspio da iz godine u godinu povećava broj organizacija koje se uključuju u zajednički plan poribljavanja, da se u akciju uključuju organizacije koje ranije nikada nisu poribljavale svoje vode i s pravom smatra da mu je to jedan od najvećih uspjeha u radu.

U 1969. godini Savez je preko svoje Komisije za unapređenje ribarstva takođe organizovao zajednički plan poribljavanja ribolovnih voda. Komisija je prikupila od svih organizacija planove poribljavanja, objedinila ih i na osnovu istih utvrdila kolike su potrebe u pojedinim vrstama mladi. Za izvršenje plana poribljavanja Komisija saveza prikupila je ponude od ribogojnih objekata u SRBiH i iz drugih republika kako bi organizacije upozнала sa cijenama mladi i transportnih troškova i omogućila im da definitivno utvrde obim svojih poribljavanja. Pored toga komisija je organizovala sastanak sa najvećim proizvođačima salmonidnih vrsta riba u Bosni i Hercegovini na kome su utvrđene cijene mladi i transportnih troškova za 1969. godinu a proizvođačima garantovan plasman svih proizvedenih količina mladi. Na ovaj način Savez je znatno uticao na stabilizaciju cijena i omogućio svojim organizacijama nabavku mladi pod najpovoljnijim uslovima.

Već je istaknuto da se u najvećem broju udruženja sportskih ribolovaca čitav rad, koji je u današnjim uslovima vrlo složen i odgovoran obavlja na amaterskoj osnovi. U mnogim udruženjima članovi upravnih odbora nemaju nikakvih iskustava u poslovima poribljavanja te im je pomoć Komisije za unapređenje ribarstva Saveza vrlo dobro došla. Komisija je za najveći broj udruženja (ukoliko nisu izrazili želju da to sami čine) sastavila i zaključila ugovore o isporuci s tim da su na taj način, nekim manjim udruženjima obezbjeđene i vrlo male količine mladi (1.000 do 5.000 komada) što one sigurno ne bi mogle

69

same učiniti. Odlukom o uslovima za sticanje participacije u troškovima poribljavanja koje je Savez priznavao iz svog Fonda za unapređenje ribarstva svim učesnicima poribljavanja, bilo je određeno da svakom prijemu mladi u ribogojnim objektima treba da obavezno bude prisutan predstavnik Komisije Saveza. Na taj način organizacijama je bio zagarantovan solidan kvalitativni i kvantitativni prijem mladi a ujedno je vršena i kontrola načina i sigurnosti transportovanja.

Komisija je vodila računa da pomogne organizacijama savjetom pri izboru vrsta riba za poribljavanje, pri izboru dijelova tokova i mjesta gdje treba izvršiti poribljavanje kao i u svim drugim poslovima vezanim za poribljavanje. Komisija se je brinula da se za nabavljenu mlad a pogotovu onu koja se nabavlja iz ribogojnih objekata u drugim republikama obezbjeđe atesti o zdravstvenom stanju i da se spriječi mogućnost prenošenja zaraznih bolesti u otvorene vode. Pored toga komisija je vodila računa da se o izvršenom poribljavanju sačine solidni zapisnici, da se sve akcije evidentiraju a da akcijom poribljavanja, gdje god je to bilo moguće, prisustvuju i organi skupštine opštine nadležni za poslove ribarstva. Pri raspodjeli deficitarnih vrsta riba kao što su lipljen, mladica i dvogodišnja potočna pastvrta komisija je nastojala da je dobiju regioni gdje je intervencija najpotrebnija.

Evo kakvi su rezultati zajedničkog plana poribljavanja ribolovnih voda u 1969. godini koje je organizovalo SSRBiH. U zajednički plan poribljavanja uključilo se je direktno ili preko Zajednice korisnika ribljeg fonda 45 udruženja i još 6 drugih organizacija koje se na bilo koji način bave unapređenjem ribarstva. U ribolovne vode pušteno je:

— potočne pastvrte mladi	614.850 komada
— dvogodišnje potočne pastvrte	9.900 komada
— dužicaste pastvrte mladi	507.800 komada
— mekousne pastvrte mladi	102.200 komada
— lipljena mladi	53.400 komada
— glavatice mladi	30.000 komada
— mladice mladi	9.850 komada
— matič. ribe i mladi ciprinida	3.435 kilograma
— matičnog raka	938 komada

Za realizaciju plana poribljavanja u 1969. godini utrošeno je 787.500.- dinara. Kao i ranijih godina tako je i za izvršenje ovog plana poribljavanja Izvršno vijeće SRBiH dodjelo Savezu pomoć u iznosu od 130.000 dinara isključivo za poribljavanje ribolovnih voda. Iz ovih sredstava odobrena je svim učesnicima participacija troškova u visini od 10 do 20% zavisno od vrste i uzrasta mladi. Nesumnjivo je da je ovakva briga i pomoć Izvršnog vijeća SRBiH za unapređenje ribarstva mnogo doprinijela da se plan poribljavanja izvrši u ovakvom obimu.

M. Vinterhalter, Sarajevo